

CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E A FEDERACIÓN DE ASOCIACIÓNS DE PERSOAS XORDAS DE GALICIA PARA O FINANCIAMENTO DE SERVIZOS ESPECIALIZADOS DIRIXIDOS A PERSOAS XORDAS, XORDOCEGAS E CON DISCAPACIDADE AUDITIVA RESIDENTES NA COMUNIDADE AUTÓNOMA DE GALICIA E DO MANTEMENTO DA FEDERACIÓN E DAS SÚAS ENTIDADES FEDERADAS PARA O EXERCICIO 2026

MEMORIA XUSTIFICATIVA

A Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coa habilitación competencial outorgada ás Comunidades Autónomas polo artigo 148.1.20 da Constitución Española, ten competencia exclusiva en materia de asistencia social, polo que, na súa virtude se aprobou a Lei 13/2008, do 3 de decembro, de servizos sociais de Galicia.

A Consellería de Política Social e Igualdade é o órgano superior da administración autonómica ao que lle corresponde as competencias en materia de servizos sociais, e consecuentemente a atención do colectivo de persoas con discapacidade, conforme ao Decreto 139/2024, do 20 de maio, polo que se establece a estrutura orgánica da Consellería de Política Social e Igualdade.

A FAXPG, entidade de natureza asociativa, figura inscrita no Rexistro de asociacións co número 2004/000107-2ª, tendo por finalidade a defensa dos intereses das persoas xordas, xordocegas e con discapacidade auditiva de Galicia; acadar a súa real e efectiva participación social, laboral e cultural, así como a súa integración na sociedade. A entidade, declarada de utilidade pública, figura recoñecida e inscrita como entidade de iniciativa social no Rexistro de Entidades Prestadoras de Servizos Sociais da Consellería de Política Social e Igualdade co número E-0204.

Actualmente faise preciso establecer medidas de apoio orientadas ao desenvolvemento do tecido asociativo integrado polas entidades de iniciativa social que traballan na atención ás persoas xordas, xordocegas e con discapacidade auditiva e ás súas familias, dado que desenvolven unha importante labor complementaria á financiadas a través dos recursos da administración pública.

Nos orzamentos xerais da Comunidade Autónoma de Galicia para o ano 2026 está prevista unha subvención nominativa a favor desta entidade, polo que para a súa instrumentación, conforme ao previsto no artigo 26.1 da Lei 9/2007, do 13 de xuño, de subvencións de Galicia, e o artigo 37.2 do Decreto 11/2009, do 8 de xaneiro, que a desenvolve, e en congruencia cos obxectivos citados, resulta conveniente a sinatura dun convenio de colaboración entre a Consellería de Política Social e Igualdade e FAXPG, toda vez que a través dela desenvólvense servizos de apoio e asesoramento e actuacións de carácter horizontal das que se benefician todas as asociacións federadas.

Así mesmo, as actuacións obxecto dos programas subvencionados a través deste convenio, recollidas na súa cláusula primeira; a súa adecuación ao ámbito competencial da Consellería de Política Social e Igualdade que asume o seu órgano de dirección, a Dirección Xeral de Persoas con Discapacidade, segundo o previsto no Decreto 42/2024, do 14 de abril, polo que se establece a estrutura orgánica da Xunta de Galicia, no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia, e no



Decreto 139/2024, do 20 de maio, polo que se establece a estrutura orgánica da Consellería de Política Social e Igualdade, que concretamente no seu artigo 21, prevé a competencia da Dirección Xeral de Persoas con Discapacidade para a proposta, o impulso, a elaboración das bases, e a tramitación dos procedementos de concesión e seguimento das axudas e subvencións a través da concesión directa ás entidades prestadoras de servizos sociais no ámbito da discapacidade; e as específicas necesidades inherentes ao colectivo ao que van dirixidas, considéranse razóns que acreditan o seu interese social.

O obxecto do presente convenio é contribuír ao financiamento por parte da Consellería de Política Social e Igualdade do mantemento da FAXPG e das súas entidades federadas, e dos servizos especializados que esta entidade ten previsto desenvolver durante o ano 2026 dirixidos a persoas xordas, xordocegas e con discapacidade auditiva residentes na Comunidade Autónoma de Galicia e que a continuación se detallan:

a) Servizo de Intervención Social

O servizo de Intervención Social vai dirixido a persoas xordas, xordocegas e con discapacidade auditiva, así como ás súas familias e/ou persoas vinculadas a elas por motivos persoais, ten por finalidade a mellora do desenvolvemento e autonomía persoal deste colectivo a través das actuacións que de seguido se relacionan:

1.º Atención á demanda: Trátase de facilitar a entrada aos servizos sociais prestados pola FAXPG, e a atención da demanda inicial de novas persoas usuarias ou de persoas usuarias xa rexistradas.

2.º Xestión de recursos: Consiste na tramitación de demandas das persoas usuarias e asociacións de persoas xordas dotándoos dos recursos necesarios.

3.º Intervención social: Levaranse a cabo actuacións sobre situacións individuais e/ou socio-familiares de persoas xordas que presentan maior vulnerabilidade social e que requiren unha intervención desde todas as perspectivas necesarias para asegurar unha atención individualizada pero integral respecto das causas que as motivan.

4.º Mediación da comunicación: Consiste na intervención sobre situacións individuais e/ou socio-familiares das persoas xordocegas e persoas xordas en situación de exclusión social que presentan dificultades de comunicación e carencias en habilidades sociais.

O Servizo prestarase por traballadores/as sociais e mediadores da comunicación lideradas por unha coordinación de área, nas axencias FAXPG distribuídas polo territorio galego, que atenderán as demandas das persoas usuarias en colaboración coas asociacións afiliadas á FAXPG.

5.º Atención psicolóxica. É un servizo directamente vinculado co ámbito da intervención social que ten como finalidade "Acadar o benestar emocional e mental das persoas xordas". O desenvolvemento deste servizo ten carácter itinerante, xa que será o/a profesional o que se desprace ás distintas delegacións da FAXPG de Galicia para prestar atención a aquelas persoas usuarias que o requiran.

b) Servizo de Intérpretes de Lingua de Signos Española e Guías- Intérpretes para persoas xordocegas (en adiante SILSE-GI)

O SILSE-GI ten como finalidade mellorar as condicións de participación e igualdade de



oportunidades das persoas xordas, xordocegas e con discapacidade auditiva, a través da eliminación de barreiras de comunicación permitindo a interrelación entre estas e as persoas oíntes, no desenvolvemento das actividades da vida diaria.

O SILSE-GI consiste en:

- A interpretación de información de Lingua de Signos Española á lingua oral e viceversa co fin de asegurar a comunicación entre as persoas xordas que sexan usuarias desta lingua e a súa contorna social.
- A guía e interpretación para persoas xordocegas, realizando as adaptacións necesarias, servíndolle de nexo coa contorna e facilitando a súa participación en igualdade de condicións.

O SILSE-GI planifícase e estrutúrase a través de 3 procesos dirixidos a calquera persoa que requira a interpretación dunha comunicación na que interveñan persoas xordas, xordocegas ou con discapacidade auditiva:

- a) Proceso de xestión e planificación da demanda de prestación do servizo: solicitude presencial, telefónica ou a través das novas tecnoloxías da comunicación. Verificación de dispoñibilidade do/da intérprete e resposta á demanda baixo criterios de orden de entrada da solicitude, axustado ás tipoloxías establecidas para actividades da vida diaria.
- b) Proceso de realización da interpretación: desenvolvemento do servizo de interpretación no lugar e data previsto na solicitude.
- c) Proceso de rexistro e valoración da demanda: rexistro dos servizos realizados, adecuación á normativa e seguimento e control de incidencias.

A Federación de Asociacións de Persoas Xordas de Galicia contratará a Intérpretes de Lingua de Signos para atender as demandas de comunicación das persoas xordas, xordocegas e con discapacidade auditiva de toda Galicia, favorecendo a súa independencia na realización de xestións persoais.

c) **Servizo de formación, orientación educativa e atención a familias**

O servizo de formación, orientación e atención a familias ten como finalidade incrementar as capacidades e oportunidades das persoas xordas a través de accións formativas prelaborais, orientación e apoio educativo e de sensibilización na súa contorna.

O Servizo coordínase dende a sede central da FAXPG Coruña e desenvólvese a través de actuacións nas seguintes áreas

- 1.º Área de Formación, consistente na realización de obradoiros formativos destinados a persoas xordas maiores de 16 anos.
- 2.º Área de Orientación e Apoio educativo atendendo as demandas e necesidades detectadas pola familia, centro de ensino ou derivado por outro servizo de FAXPG.
- 3.º Área de Difusión e Sensibilización
- 4.º Actividades para as familias, consistentes principalmente en obradoiros puntuais de carácter pedagóxico e corta duración e formación en lingua de signos dirixidos ás familias.

O equipo de profesionais estará formado por persoas xordas e oíntes, titulados



adecuadamente para os postos que se requiren: educadores, psicopedagogos, pedagogos, logopedas e especialistas de Lingua de Signos

d) Mantemento da estrutura asociativa da FAXPG e servizos de apoio:

A FAXPG, a través do mantemento dunha estrutura estable, fomenta a cohesión asociativa como ferramenta de defensa dos intereses das persoas xordas, xordocegas e con discapacidade auditiva, e actúa como plataforma de información e foro de discusión das persoas que a integran, facendo de intermediaria entre a sociedade e este colectivo no ámbito xeográfico de Galicia, así como de instrumento organizador de actividades e servizos que favorezan o desenvolvemento persoal e social do mesmo.

Para o cumprimento da finalidade prevista na cláusula primeira deste convenio a Consellería de Política Social e Igualdade achegará novecentos nove mil oitocentos vinte e seis euros (909.826,00 €) que serán imputados á aplicación orzamentaria 08.04.312E.481.23, con código de proxecto 2015 00492 dos orzamentos xerais da Comunidade Autónoma de Galicia para o ano 2026.

A dita cantidade destinarase aos gastos de persoal e gastos correntes necesarios para o mantemento da FAXPG e as súas entidades federadas, e o desenvolvemento das actuacións antes citadas.

Na cláusula sétima do convenio prevese un anticipo de pagamento do 80% do importe da subvención, coa finalidade de que a entidade beneficiaria dispoña desde o inicio do exercicio económico da liquidez suficiente para facer fronte ás obrigas económicas derivadas da execución deste convenio. Isto ben motivado porque ao tratarse de entidades sen ánimo de lucro, unha parte importante do seu financiamento procede das Administracións Públicas, e non contan coa liquidez suficiente ao inicio do exercicio para o desenvolvemento dos programas e actuacións que desenvolven para a atención ás persoas con discapacidade, o que implica ter que acudir a liñas de crédito con entidades bancarias en tanto non perciben o pagamento da subvención concedida, co sobrecusto que iso implica. Así mesmo, conforme aos antecedentes neste centro directivo, as subvencións concedidas en exercicios anteriores a esta entidade están sendo correctamente xustificadas en tempo e forma.

En consecuencia, e dado que ditas condicións de pagamento exceden dos límites previstos no artigo 63.1. un do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, e conforme ao previsto no artigo 63.3 da dita norma será preciso autorización do Consello da Xunta para a tramitación deste expediente de gasto.

Santiago de Compostela, na data da sinatura dixital

A directora Xeral de Persoas con Discapacidade

P.A. Disp. Adicional 1ª do Decreto 139/2024, do 20 de maio (DOG núm. 101, do 27.05.2024)

O director Xeral de Maiores e Atención Sociosanitaria

Antonio Acevedo Prado

